

開放文學 – 歷代筆記 – 夷堅甲志 卷第五

宗回長老 僧宗回者·累建法席·最後住南劍之西岩·道行素高·寺多種茶·回令人芟除繁枝·欲異時益茂盛·實無它心·有僧不得志於寺·詣劍浦縣訴雲·回慮經界法行·茶稅或增故爾·縣知其妄·撻逐之·僧復告於郡·郡守亦素聞回名·不然其言·復撻之·僧不勝忿·詣漕台言所訴皆實·而為郡縣抑屈如此·乞移考它郡·漕使下其事於建州·州遣吏逮回·吏至促其行·回曰·幸寬我一夕·必厚報·吏許為留·回謂其徒曰·是僧已再受杖·吾若往自直·則彼復得罪·豈忍為此·吾不自言·則罪及吾·吾亦不能甘·不如去此·僧徒意其欲遁·或有束裝擬俱去者·明旦·回命擊鼓升座·慰謝大眾畢·即唱偈曰·使命來追不暫停·不如長往事分明·從來一個無生曲·且喜今朝調得成·瞑目而化·時紹興十九年·

義鵲

紹興十六年·林熙載自溫州赴福州侯官簿·道過平陽智覺寺·見殿一角無鴟吻·問諸僧·僧曰·昔日雙鶴巢其上·近為雷所震·有蛇蛻甚大·怪之·未敢葺·僧因言寺素多鶴·殿之前大鬆上·三鶴共一巢·數年前·巨蛇登木食其雛·鶴不能御·皆捨去·俄頃引同類盤旋空中·悲鳴徘徊·至暮始散·明日復集·次一健鶻自天末徑至·直入其巢·蛇猶未去·鶻以爪擊之·其聲革革然·少選飛起·已復下·如是數反·蛇裂為三四·鶻亦不食而去·林誦老杜義鶻行示之·始驗詩史之言·信而有證·二事熙載說·

又台州黃岩縣定光觀岳殿前有塔·鶴巢於上·一蛇甚大而短·食其子·其母鳴號辛酸·瞥入海際·少時引二鶻至·徑趨塔表·銜蛇去·陳燿說·

陳國佐

陳公輔國佐·台州人·父正為郡大吏·歸老·居於城中慧日巷·時國佐在上庠·有僧謁正·指對門普濟院曰·俟此寺為池·貢元當上第·正曰·一剎壯麗如此·使其不幸為火焚則可·何由為池·君知吾兒終無成·以是相戲耳·僧曰·不過一年·吾言必驗·普濟地卑下·每春雨及梅溽所至·水流不可行·寺中積苦之·偶得曠土於郡倉後·即徙焉·而故基卒為池·與僧言合·政和癸巳·國佐遂魁辟雍·釋褐第一·後至禮部侍郎·

中山菌

台州資聖寺僧覺升·築庵巾山上·嘗早出戶·有大蟒橫道·命僕舁去之·是日偶行鬆徑中·見數菌鮮澤可愛·即摘以歸·烹飪猶未熟·蛇以百數繞釜蟠踞·升大懼·急入室坐榻上·方欲就枕·則滿榻皆蛇·不可復避·而同室僧皆無所睹·升即死·

許叔微

許叔微·字知可·真州人·家素貧·夢人告之曰·汝欲登科·須積陰德·許度力不足·惟從事於醫乃可·遂留意方書·久之·所活不可勝計·復夢前人來·持一詩贈之·其詞曰·藥有陰功·陳樓閒處·堂上呼盧·唱六作五·既覺·姑記之於牘·紹興壬子·第六人登科·用升甲恩·如第五得職官·其上陳祖言·其下樓材也·夢已先定矣·呼盧者·臚傳之義雲·

陳良器

陳良器·好施食·紹興十一年·子燿為婺州武義尉·迎之官·嘗同至郡·忘攜食盤·行次夜夢舊友夏呂二人者來·曰·連日門下奉候不見·不知乃在此·覺而言之·方審其故·亟就邸中施焉·右四事皆陳燿說·

人生驚

予宗人性喜獵·遇其興發·雖盛寒暑不廢·末年得疾·背生三物·隱隱皮肉間·數日頭足皆具·儼然三驚也·已而能動·或以魚誘之·則其頭闐然如欲食狀·稍久左右齧食·痛不可忍·凡月餘而死·死五日·其靈憑子岳之婦·語曰·我坐好獵·生受苦報·今日猶未已·冥間方遣使追我獵具為證·及其未至·可取罔罟之屬急焚之·無重吾罪·岳如其言遂去·時紹興七年也·

黃平國

黃衡·字平國·建州浦城人·紹興十年·自秘書省正字出通判邵武軍·未赴任而卒·卒之三年·裡人有為商而死於宣城者·其家未知·魂歸附語家人曰·我某月某日以疾終於宣州·從行某僕實殯我·斂時倉卒·遂遺一履·既入幽府·遇黃省元即衡也憐我跣足行·以鞋一編與我·仍令一介引我歸·是以此至·家人曰·黃公今何在·曰·見判陰間一司極雄緊·家人方持泣·遽捨去·其子即日往宣州取喪慾火之·啟棺驗視·果跣一足·

閩丞廳柱

紹興己巳二月二十五日·福州大雷雨·閩丞薛允功·未明起·聞霹靂聲甚近·及旦·廳事一柱已斧為三·附棟椽泥·皆墜碎土如爪跡·印於書幾及狼籍西廡間·時將迎新丞·胡床兩蓋之屬·皆倚柱側·意必震動·乃徙在壁下·略無所推·先是薛之子嘗見一青蛇入柱下·戲擊其尾不可出·既震·皆疑其物蓋龍雲·薛丞說·

皮場大王

席旦·字晉仲·河南人·事徽廟為御史中丞·後兩鎮蜀·政和六年·終於長安·其子大光益終喪後·調官京師·時皮場廟頗著靈響·都人日夜旅施金帛·大光嘗入廟·識其父殮時一履·大驚·既歸·夢父曰·我死即為神·權勢甚重·不減在生作帥時·知汝苦窘用·明日以五百千與汝·大光悸而寤·聞扣戶聲甚急·出視之·數卒挽一車·上立小黃幟·雲皮場大王寄席相公錢三百貫·置於地而去·時正暗未辨色·猶疑之·既明·乃真銅錢也·大光由此自負·以為必大拜·紹興初·參知政事·後以大學士制置四川·蜀人皆稱為席相公·已而丁其母福國太夫人憂·未除服而薨·嚴康以子祁說·

蔣通判女

錢符·字合夫·紹興十三年·為台州簽判·往寧海縣決獄·七月二十六日·憩於妙相寺·方憑桮戲書·有掣其筆者·回顧無所見·是夜睡醒·覺床前彷彿似有物·呼從卒起張燈·作誓念詰問·遂不見·次夜復至·立於故處·符問之·若果是鬼·可擊屏風·言未既·自上至下·凡擊數十聲·符大懼·命燃兩炬於前·便有大飛蛾撲燈滅·物踞坐榻床上·背面不語·審視蓋一婦人·戴圓冠·著淡碧衫·係明黃裙·狀絕短小·久之不動·符默誦天蓬咒數遍·遽掀幕而出·宿直者迭相驚呼·問其故·曰·有婦人自內出·行甚亟·踐諸人面以過·說其衣服·乃向所見者·符謂已去·且夜艾不暇徙·復就枕·夢前人徑登床·枕其左肩·體冷如冰石·自言我是蔣通判女·以產終於此·強符與合·符力拒之·遂寤·次日·詢諸寺中寓居郭元章者·言其詳與符所見無異·設榻處正死所也·符說·

葉若谷

承信郎葉若谷·洪州人·為鑄錢司催綱官·廨舍在虔州·葉不挈家·獨處泉司簽廳·紹興甲子歲正月十六日未晡時·有女子款扉而入·意態閑麗·前與葉語·初意其因觀燈誤至·未敢酬·恍惚間不覺就睡·女亦至則並寢·以言挑之·陽為羞避之狀·已而遂合·凝然一處子耳·良久歡甚·一老嫗自外至·手持錢篋·據胡床·箕踞而坐·傍若無人·徑趨床揭帳·以兩手拊席曰·你兩個好也·葉疑女家人·懼甚·女搖手掩葉口·令勿語·嫗遂退·女迨夜分方去·自是連日或隔日一至·至必少留·葉猶以為旁舍女子·往來幾兩月·漸覺羸悴·繼得疾悞甚·徙居就醫·乃絕不至·方初見時·著粉青衫水紅袴襪·既久未嘗易衣·然常如新·亦其異也·若谷說·

劉氏冤報

高君贊·福州人·登進士第·為檀氏孀婦·生一子·既長·納同郡劉氏女為婦·生二男一女而子死·君贊仕至朝散郎·亦亡·

長孫不慧·次孫幼·唯檀氏與劉共處·劉年尚壯·失婦道·與一僧宣淫於家·姑見而責之·劉恚且懼·會姑病不侍藥·幸其死·置蠱以毒姑之二婢·未及絕·強斂而焚之·後數月·劉得疾·日日呼所殺婢名·曰·我頗極痛·勿擲我發·又曰·極我已多·幸少寬我·其家問之·曰·阿姑與二婢守答我·旬日而死·其子以祖致仕恩得官·亦不立·今家道蕭然·君贊從子介卿說·

江陰民

林敷明甫言紹興六年·寓居江陰·時淮上桑葉價翔踊·有村民居江之洲中·去泰州如皋縣絕近·育蠶數十箔·與妻子謀曰·吾比歲事蠶費至多·計所得不足取償·且坐耗日力·不若盡去之·載見葉貨之如皋·役不過三日·而享厚利·且無害·妻子以為然·乃以湯沃蠶·蠶盡死·瘞諸桑下·悉取葉桌舟以北·行半道·有鯉躍入·民取之·剖腹實以鹽·俄達岸·津吏登舟視稅物·發其葉·見有死者·民就視之·乃厥子也·驚且哭·吏以為殺人·拘繫之·鞫同舟者·皆莫知·問其所以來·民具道本末·縣遣吏至江陰物色之·至其家·門已閉·壞壁以入·寂無一人·試啟蠶瘞驗之·又其妻也·體已腐敗矣·益證為殺妻子而逃·無以自明·吏亦不敢斷·竟斃於獄·此事與三水小牘載王公直事相類·

蛇報犬

世傳犬能禁蛇·每見必周旋鳴躍·類巫覡禹步者·人誤逐之·則反為蛇所齧·林明甫家犬夜吠·燭火視之·見一蛇屈蟠·犬繞而吠·凡十數匝·蛇死·其體元無所傷·蓋有術以禁之也·林宏昭言溫州平陽縣道源山資福寺·有犬名花子·善制蛇·蛇無巨細·遇之必死·前後所殺以百數·一日·大蟒見於香積廚·見者奔避僧急呼花子·令噬之·未及有所施·蛇遽前迎·齧其領·犬鳴號宛轉·須臾死於階下·蛇亦不見·豈非其鬼所為乎·物類報復蓋如此·

蔣寧祖

蔣寧祖者·待制階之子·年四十·官至朝請郎·當遷大夫·不肯就·父母強之·不得已自列·既受命即丐致仕·自是不御朝衣·常著木束布道服·請於(此下原闕一葉又五行)

李氏乳母缺

內文缺

趙善文

撫州金溪縣·有神廟甚靈顯·所請者施金帛·無虛日·積錢至二千緡·宗室善文過廟·心資其利·焚香禱曰·損有餘·補不足·人神一也·善文至貧·願神以二十萬見假·不然·將白於官·悉籍所有而焚廟·神雖怒·若我何·既禱即呼廟祝取錢·祝無辭以卻·但曰·神許則可·善文取杯投擲之·連得吉卜·再拜謝·連鑰以出·如是十年·夢神來謂曰·曩日所貸·今可償矣·夢中窘甚·約以緡錢還之·神不可·曰·此特虛名耳·又欲倍其數·亦不可·善文計窮·以情告曰·一時失計為人·今實無可償·願神哀釋·神沉思良久·曰·必無錢見歸·但誦金剛經·每卷可折一千·他無以為也·既覺而懼·遂遽齋戒·取經諷讀·凡三日得二百過·默禱以謝之·後不復夢·陳寅伯明說·

林縣尉